

## Къурбан-байрам

Къурбандалул къини хъанахъ-иссар бусурманнал яла хъунмур байрам. Му диклайссар Зуль-хИжжа зурул 10-мур къини. Мунил хъхъичИсса къини Аърафатрал къинири. Байранналул хъиривсса шанма гъантлуйн (11-мур, 12-мур, 13-мур) учайссар ташрикьрал гъантри куну. Аърафатрал къинигу хъхъичкъинигу зума дугъаву суннатссар.

автор: Мурад Багъаудинов

**К**урбан-байрамрал къини ягу ташрикьрал гъантрай къурбан биххаву Идавсил ляличИсса къулагъас дуллай ивкИсса суннатри (суннатул-муаккад). Идавсил увкуссар: «Тул умматрава яла лайкъминнали Къурбан биххайсса» - куну.

Къурбандалун биххан бучИссар варани, оьл, ниц, яттил хИайван. Къурбандалун биххайсса хИайван варани бухъурча ряххулку шинавун бувхсса биклан аьркинссар, гъаттарал хИайван бухъурча шамулку шинавун бувхсса биклан аьркинссар. Ми арула инсаннахлу ца биххан бучИссар. Яттил хИайван ппалулсса бухъурча, кИику шинавун бувхсса биклан аьркинссар, гъалулсса бухъурча шамулку шинавун бувхсса биклан аьркинссар. Яттил хИайван цаннахлу бакъа биххан къабучИссар. Вай бакъасса цамур хИайван биххаврийнугу Къурбан шаллу къашайссар. Бивхсса Къурбандалияту ца базу бунугу, шакъархъунна чара бакъа мискинтуран дулун ялувссар. ЛирчИмур шархъун цаллагу дуркуну, цанна ччинангу дулунссар. Яла хъинмур – винма барачатран шаппа ца касак къабивтун, лирчИмур мискинтурайх дачИавури. Мунил



бурчу биклу, дикI диклу даххангу къабучИссар, садакъалун дулайссар, ягу укра цаманан дулайссар, ягу цалла дуркуну, ишла дурну мюнпат ласайссар. Кулпатраву ца инсаннаха Къурбан биххарчагу, суннат биттур баврил чири шалва кулпатрайн бияйссар.

Къурбан биххаврил цаппара шартIру дуссар:

1. Къурбандалун биххайсса хИайван ялув чивчусса оьрмулувусса биклан аьркинссар.
2. Къурбандалун биххайсса хИайван аьй дакъасса, сагъсса биклан

аьркинссар. ИлтIасса, мурчИсса, аьрччасса, сакъатсса, вичИлиия ягу магърая парча къувкъусса, хъяшхъярсса, къашавайсса биххан къабучИссар.

3. Къурбан биххаврил чIун Къурбандалул къини Эдрал чак бувну махъ дайдишайссар, му чак баннин хъхъичI биххан къабучИссар. Му чIунгу диклайссар шамулчинмур ташрикьрал къини баргъ гъаннин. Ми гъантрай дяхтта биклу, хъхъувай биклу биххан бучИссар.

4. Къурбан биххансса нийят диклан аьркинссар.

» 6

Ва номерданий :



лаж. 3

Бархъаллал шяраваллил имамнал кумагчинацалсса ихтилат



лаж. 4

Зуль-хИжжа барз



лаж. 7

Дахху-ласулуд цаппара шартIру ва адабру

## Куматусса СалихI-апанни

Кумиял СалихI-апанниннал оьрмулиясса чIявусса хаварду ттинин ливчIун бакъар. Га хъинну караматсса аьлимчу ивкIун ур, ганал ххаллилсса шеърирду чичайсса бивкIун бур. Ганан циняв Дагъустганнал миллатирттал мазру кIулну бивкIссар тIар.

макъала: Аьйшат ХIажиева

**С**алихI-апанниннал оьрму бавхIуну бивкIун бур Сурхай-хан Хъун Буттал дяъвирдащал. Кумиял СалихI-апанни дуклай ивкIссар МухIаммад УбричIа. Гъазаватрал хIал ганан кунма цаманан кIулну къабивкIун бур. Цал Сурхай-хан Хъун Буттал цала нукартал гъан бувну бур Кумав СалихI-апанниннал хъирив. СалихIлугу гайннахъ увкуну бур: «Зу насияра,



на хъирив учIанна», – куну. Нукартал Гъумукун биявайсса чIумал ЦицIалтта бакIуха кIяла чай гайннал хъхъичIун СалихI увккун ур. Нукартал-гу махIаттал хъуну ливчIун бур.

СалихI-апанниннал зикри хъинну къянкъану, оьтту-гтурчIавун бюхханну бишайсса бивкIссар тIар. Гъази-Гъумучиял шайх Жамалуттин (къ.с.) ганачIа дуклай ивкIссар тIий бур. СалихI-апанни ивкIуну махъ, 16-ра шинаву Жамалуттин лавгссар тIар Ашттарханнайн яла Туркнавун. Декабрист ва оьруснал машгъурсса чичу А. А. Бестужев-Марлинский хъамалу хъуссар Гъази-Гъумучиял Аслан-ханначIа. Шикку ккакксса СалихI-апанниннал сипат ккаккан дурну дур цалва Мулла-Нур тIисса луттираву. СалихI-апанниннал Сурхай-хан Хъун Буттан хас бувсса шеърирду ттинингу ливчIун бур.

## Буттахъал хурмат буруччинну!

**Х**урмат бусса лакрал жямат!  
Ца дурксса лакрал вирт-таврал Сурхай-ханнал, Хан-Муртазааьлил ва гайннашал архал душманнайн кьарши бувкминнал гьунарду ва хьуннасса ххушаву дакнин дуглагисса лишанну Лаккуй чьарусса лирчун дакьар. Ца мукунасса лишан хъанай дур Гъази-Гьумучиял шьравусса Ханнал мизит ва ганил хлятравусса Хан-Муртазааьлил гъав (сурат №3). Мукуна, Сурхай-ханнал гъавгу шиккура дуссар тлар. Кай ливчисса кялабарзругу, мизит ва чларавсса мадрасалул кьатригу (сурат №1) цу дуккан дуллай тамансса шинну хьуну дур, амма уттигу дакьин дурну щаллу дан бюхълай бакьар. Мизитрал магъи даххана дан дур, вивсса давурттив кьуртал дан дур. Мадрасалул кьатравугу вивсса давурттив кьуртал дан дур, члавахъултту баххана бан бур. Мунин бувну, тавакьюри каши думиннал цацава шайсса кумаг баву. Мува куцдуй, уттигъанну кил хьунни Хьун бярнил ялувсса мизитту (сурат №4) бувну бивкшиву Чулахъ Сурхай-ханнал. Му тастикъ бувну бур этнолог Л. И. Лавровлул кля мизитрай бивкисса чарийсса чичру (сурат №2) таржума дурну. Чаругу бур хлакьинусса кьини Махлачьалаливсса музейраву. Чичрулул оьрус мазрайнсса таржумагу вари: «Соорудил эту мечеть Сурхай, сын Гирея, завоеватель Шемахи и Ширвана в 1139 г. В эти годы началось движение османов и русских». (Бусурманнал календарданул 1139-ку шин хъанай дур 1727-ку шин).  
Ва мизитту, ванил чларавсса Хьун зилугу бакьин бан бур: магъи дишин дур, щин дуцин дур ва мукуна цайми давурттивугу дан багълай бур.



Сурат №1. Мадраса.



Сурат № 2.

**Арцуйну кумаг бан ччиминнаца ва четрайн дичин хьунтиссар:**

КБСР «ДАГЕСТАН»  
ООО г. Махачкала  
Счет 40703810400000000346  
БИК 048209763  
Корр. счет 3010181050000000709  
Реквизиты банка: ИНН  
0541002615 КПП 054101001  
ОГРН 1020500001422

Цухху-бусу бан бюхъантиссар ва номерданийх тел: 8-928-526-13-17.

Гъази-Гьумучиял имам  
Саламов Мухаммад-хаж



Сурат № 3. Ханнал мизит.



Сурат № 4.

## Жува щил лагъартру?

Уттигъанну ца мизитрал имамнацан ца хьамитайпа бувклуна цила арснаха дуаь дува тий, га чак буллай айишиншиврул. Ганил бусаврин бувну, оьрчал зума дугъайсса дур, садакьартту байсса бур, цувагу хьинсса, щинчлав зарал биян кьабайсса усса ур, амма чак буллан ччай акъар тлар. «На бунагъру кьабара, мунияту чакгу кьабулланна, чак бувача бунагъру байминнал», - учай тлар ганал.

макъала: М. Хажиев

**И**мамнал га шарссанихъ цуьвххуну бур: «Вил арс ци дуллай ур, чув зий ур?» - куну. «Школалий дарс дихълай уссар», - увкуну бур шарссанил. «Цанма буллалисса харжирая рязину урив?», - суал бувну бур аьлимчунал. «Рязину цукун икнанссар, ганал харж хьинну чивисса бур, цувагу кьинибархан даврийгу ивкун, увххун учлай», - куну бур ганил. Имамнал цуьвххун бур: «Ина ганан чак бан лахъхьин буллан та байбихъура?» - куну. Ххал барча, арс чивину унува, цичлав лахъхьингу кьабувну, утти га хьуна хьувкун лахъхьин буллай байбихъуну льякьуну бур, «га чумал замана гукунасса бия» тий. Хьунмур аьй нитгий диркун дур, хлазран бакъархха шариатраву арулла шин шайхтту оьрчан чак бан лахъхьин бувара тисса. Жулва дянив га оьрч кунмасса цаймигу бур, кляпиклякьиншиврул кюрххилния хьхьувайнин давурттай зун хладурсса, амма цува ляхъан увсса Заннал ялув бувмур бан ччай бакъар. Чансса бакъар га хьамитайпалул арсал кунма зума дугъайсса амма чак кьабайсса. Му бувчин хьинну захиматсса зад бур, цанчирча, Аллагънай вихну бакъахьурча, зума дугълан циванни, вихну бухьурча, чак кьабуллан цукун шайссар!? «На бунагъ кьабайнутгий чакгу кьабара» тисса щайтаннул макрулийн чьавумий бирияй. Мукуминнан чак байсса инсан махъа-махъсса бунагъкарну члалан иклайривав, «цалва бунагъру шюшиншиврул чакру буллай ур» тун биклай. Аллагъу Тааьланал Цалва лагъартуннайн бувсса амрулий щак тисса кланайн увтун ур му щайтаннул. Заннаха лагъшиву цукун дан аьркинсарив цанма Заннаяр ххуйну щин киллсар? Ва ишираву укунсса мисала буцин бучир: ца инсаннал ур кля кьуллугъчи увгуну, гайннан гьарзад аьркинмургу щаллу дуллай. Кьуллугъчитурал даву дур ссуткалу мутталай ца ссятрал дянив дурну кьуртал дайсса. Гамур чумал гай цахава зун бивтун бур. Гайннавацца ца ур цалва бан аькинмур щаллуну биттур бан хларачат буллай, ци-дунугу диялдакъашиву ягу хатла хьурча, гацлана залуннахъ багъишла итигу тий. Ваманаллив диялдакъашивуртту ита кьадакьай, амма залуннал дува кусса давугу биттур кьадай, га заллушиврун ккалливагу кьаай. Ттул пикрилий кля цалчинма кьуллугъчи залуннан ххирану икнанссар ваманаяр. Аллагънал жучанмасса рахму-цимилул дазу дакьассар. Кьуръанналуву бумунин вихсса инсаннаца чак кьабуллан цукун бюхъайсса? Цавагу бунагъ бакъасса Мухаммад Идавсилгума ччанну бурухханнин эбадат дайсса диркхьурча, жунна суждалия бакъ гъаз дансса чуннагу кьадиклан аьркинни. Жулла диндалува бумуния так мюнпат бакъа, зарал бакъашиву бувчинсса аькьлу Аллагънал булуннав!

## Шагъид хъама кьаивтессар

**О**ктябрьда-нул 6-нний Махлачьалаливсса теологиялул институраву хьунни Макьсуд-хаж Са-дикьовлул аьпалун хас бувсса online-конференция. Конференциялуву гуртту хьунни Москвалиясса, Уфалиясса, Казанаясса ва цаймигу шагъур-даясса вакилтал. Конференциялий махъ лавхъунни Дагъустаннал Муфтий Ахмад-хаж Аьбдулаевлул:



«Макьсуд-хажинал цацава шаймур буллай, Дагъустаннай ислам гъаз даншиврул хьунмасса захимат бувссар» - увкунни Муфтийнал. «Мудан Исламраха кьуллугъ буллан» - ва бия Макьсуд-хажинал оьрмулул мурад ва девиз. Ганал дурсса даврин кьимат бищун хьинну захиматну бур, цанчирча ганал щалвагу оьрму диндалуха зий гъан бувна. Аллагънал Алжан-нул ххари аннав!

### Учредитель

Благотворительный фонд «Путь».  
Газета печатается по согласованию и одобрению  
Духовного управления  
мусульман Дагестана

### Редакционный совет

Председатель редакционного совета  
муфтий РД  
Ахмад-хаджи АБДУЛАЕВ  
заместитель муфтия РД  
Махди-хаджи МУТАИЛОВ

### Главный редактор

Патимат ГАМЗАТОВА

### Редактор

Иса ОМАРОВ

### Канонический редактор

Курамухаммад МАГОМЕДОВ

### Корректор

Курбанисмаил АМИРОВ

### Ответственный секретарь

Ахмад МАГОМЕДОВ

### Менеджер

Абдусабир АХМЕДОВ

### Дизайн, вёрстка

Лейла ГУСЕЙНОВА

Газета зарегистрирована Федеральной службой по надзору в сфере связи, информационных технологий и массовых коммуникаций.

Свидетельство о регистрации  
ПИ № ФС 77-37006 от 29 июля 2009 г.

При перепечатке ссылка обязательна.  
Набрано и сверстано на компьютерной базе газеты  
«Ассалам».

Отпечатано в ООО «Дом печати»  
по адресу: пр-т Акушинского, 20

Заказ № \_\_\_\_\_

Тираж 3. 550 экз.

Сдано в печать 14 октября 2011 г. в 21:30

### Индекс 51388

### Адрес редакции

367015, РД, г. Махачкала,  
ул Азиза Алиева 2.  
Тел.: (8722) 61-00-64.

По вопросам подписки и доставки обращаться по телефону:  
по Республике Дагестан – 8-988-699-28-24  
по г. Махачкале – (8722) 914-222.

E-mail: assalamlak@mail.ru;  
www.assalam.ru

# Аьлимтурал шяравалу

БАРХЪАЛЛАЛ ШЯРАВАЛЛИЛ ИМАМНАЛ КУМАГЧИНАЩАЛПССА ИХТИЛАТ

Сайфуллагъ, инава имамнал кумагчину зий цукун айивхуссарав буси. Исламрал университетраву дуккаву къартал дурну махъ на зий уссияв Ас-салам кказитрал редакторну. Яла жула муфтий АхИмад-Хажинал амрулийну на тIайла увкссара ттула шяравун имамнал кумагчину.

## Хакьинусса къини Бархъарав диндалул тагъар цукун дур?

Шярывусса диндалул тагъар оьккину дур учин къахъунссар. Жамятраву бур чак байсса, тIарикьатрал вирд ларьсса инсантал. Жул шяраватусса шама оьрчI Исламрал университетраву дуклай бур. Аммарив цаппара цайми лакрал шяраваллаунир, даргиял, ярусаннал шяраваллаунир динналул чулухунмай хъарану буру. Шяраву дин гъаз дан хъуннасса даву дувай жул имам Сиражудиннул арс МухIаммадлул. Ванал буттагу дурккучув ивкIун ур. Ганал цала арсангу «ГьунчIукъатIан», «Бархъаран» ва цаймигу луттирдайх дин лахъхьин дурну диркIун дур. Бархъаллал шяраву динналул чулуха бакI дургъусса инсан, жяматран бусравсса, мунал мукъух жяматрал цах вичи дишайсса му хъанай ур.

**М**ухIаммадаьлиев Сайфуллагъ, увссар Бархъаллал шяраву 1984-ку шинал. Школа къуртал буну махъ увхссар МахIачкъалаливсса МГОУлувун. Гиву дуклай унува увхссар МахIачкъалаливсса Исламский университетравун. ЦIана зий уссар Бархъаллал шяраваллил имамнал кумагчину ва Лакрал ва Ккуллал районнай Ас-салам кказитрал вакилну.



## ХъхьичIава шяраву бивкIсса аьлимтурая ци бусан хъунссар?

Шяраву оьрму бивтсса хъуниминнал бусаврин буну, жун кIулли хъхьичIава Бархъарав чIавусса аьлимтал бивкIшиву, ва элмул даража ва къимат хъунмасса бивкIшиву. Бархъаллал аьлимтурал цала шяраву Къуръан лахъхьин къабувсса оьрчIгу къаитайсса ивкIун ур. Шикку бивкIссар Маллай, Халипа-Оьмар, Мудун Абдуллагъ, Мирза-къади тIисса машгъурсса аьлимтал. Халипа-Оьмардул чивчуссар цинявпапу лакран «Бархъаран» тIий кIулсса «Бустанул-ХIукъукъ билисани Гъази-Гъумукъ» тIисса лу.

Бархъаллал Маллай хъинну караматсса, инсаннал дакIнивун, чурххавун ццихъ бутлатисса ххуйсса чIуний мавлуд-зикрирду байсса бивкIун бур. ЦIанагу ттучIа бур жяматрал агъулданул буллаи бавтIсса 70-ннийн бивсса хъхьичIавсса фикъгьилул, тIарикьатрал ва цаймигу луттирду «Бархъаллал мизитрал вакъфу» тIий ялув пачапIругу бивчусса. Вайннувах Имам Гъазалинал чивчусса «ИхIгъарая» байбихъуну, чIавусса хъунисса аьлимтурал луттирду бур. Вай луттирдайнугу чIалай бур хъхьичIава шикку дин дургъусса инсантал бивкIшиву. Амма, хъхьичIава кунма элмулухун багъсса инсантал цIана чанну бур.

## Шяраваллил администрациялул чулуха кумаг бурув?

Администрация мудангу жун кумаг бан хIадурну бикIай, динналул чулухунмай цащава шайсса кумаг бай. ЦIана цалва чулуха мизитравун щин дуцIай бур.

## Бархъаравсса мизит ци заманнай бивсса бур?

Жул шяравалу хъхьичIра ххюра кIанай диркIссар тIар. Яла мий цанма бигъа-шиврун цацIун хъуну, ца шяравалу дурну дур. Мунияту, хъхьичIава Бархъарав ххюва мизит бивкIун бур. ЦIана бур так ца Барщиял мизит ливчIун. Ва цуппагу Совет хIукуматрал чIумал ппив-ххив буну, гъанурдува бивххун, башттанма зия буну бивкIссар. Яла жамятрал 1991-ку шиная байбихъуну 7-8-ра шинал мутталий гава кIанай, гакссава мизит цIунил бацIан бивссар. Мизит цIу буккан бан хъунмур кумаг бивссар МахIмил Мариян тIисса хъамитайпалул ва ганил арсаврал ва щалвагу жамятрал шайманал шайсса кумаг буллаи. Аммарив мизитраву уттигу дансса давуртту дур.

## Лакрал щархъаву Ас-салам кказит чичаву цукун най дур?

Зунттавусса лакрал щархъаву подписка къадурсса шяравалу дакъассар, цинугу 1100-ния лирчусса дур. Жул мурадгу – хъуннасса дикIу, чIирисса дикIу, подписка къадурсса щар лях личIан къадаури, цанчирча, чIявучин Ас-салам кказит бакъа диндалиа кIул бансса цамур сант дакъасса шяравуллугу дунугий. Жущава шайсса хIарачат жу бувару гъарцанначIан кказит биян бан, га цацIанма бивкIун махъ инсаннай цайрасса ялуршинна хъанай дур га буккаву. Жунма цинявннангу, хаснува жагьилтIуран, хъхьичIава-хъхьичI тIайласса дин-ислам дуруччин, динналул гъанурду кIул бан аьркини, чак буллан аьркини, му диндалул ттарцIри. Аллагъу Тааьланал цинявпапу бусурман тIайласса ххуллийх бачин баннав, фитна-балардаща буруччиннав, ахир хайр даннав. Амин!



Бархъаллал щар.

## Шяравусса дуклаки оьрчIащал, жагьилтуращал цукунсса даву дувару?

Школалий дуклакисса оьрчIащал хъунабакъавуртту дувару, иман-исламрая, нитти-буттаха хIурмат бан аьркиншивруя, аьркин бакъасса ххуллурдая, вагъгабизмалия, лагма-ялттунащал, чIахху-чIарахнащал, гъанмаччаминнащал бусурманчув цукун икIан аьркинссарив бусару. Цанчирча, инсан Аллагнайн ﷺ вих хъуну махъ, дин дургъуну махъ, мунай ялувсса зад хъанай бур нитти-буттан хIурмат баву. Утти цIусса дуккавил шин дайдирухунни, гъашинугу къаст дур гай хъунабакъавуртту цIунилгу дуллансса.

# ХIажитуряхъ аманат

Ас-саламу аьлайкум  
Ххирасса Заннал ﷺ хъамал,  
Къаст лархIуну найссарув  
Гъашину зугу хIажлийн.

Жула Заннал ﷺ оьвкуну,  
ХIаж бунан нясив бивсса  
Зувух навагу ччива  
Цал ттигу Къаьба ккаккан.

Заннан ﷺ ххира хIажитал  
Аьрафа зунттуцI ливкний  
Дагъусттан бусурмантал  
Дуаьлуву бишара!

Аьрафа зунттууйн бивкIун  
Гъар шинал Хизри ﷺ, Ильяс ﷺ  
ХIажитурал архIал  
ХIаж буллан бикIайссар тIар.

Му къинилул даража  
Хъинну лахъсса буссару,  
Аьрафа къини дурса  
Дуаь къамул дайссари.

ЦIана дягьирду найсса  
Бусурман хIукуматру  
Зулмулуца ххассал да  
Учара дуаьлуву!



Хъинну хIаж бунан ччайна  
ХIаж бан къавхъуцириннан  
ХIаж бунан нясив бува,  
Куну, дуаь дувара!

КъабалучIан бивукун  
Дуньял хъама дитайссар,  
Дуньяллийва алжан  
Къавксса ххан бикIантIиссар.

Къабалухъ салам булун  
Зу хъама мабитари.

Жаваб къабаярчагу,  
Салам къамул байссари.

Лагма лавг малаиктал  
Салам буллаинма буссар.  
ХIажлийн бивкI хIажитуряхъ  
Жунма къабаллайнугу.

Хъинну адаб дургъуну  
Гъан хъира КъабалучIан,  
Адабирай тIаваф дан  
ХIарачатгу бувара.

Дуаьрду чIяру дара,  
Зикри гъарзану бара,  
ТIавафрай заназиний  
Зал ﷺ дакIниву угъира!

Заннал ﷺ мукунсса неъмат  
Гъарцаннан къабулайссар,  
Щукру чIявуну бара  
Буллусса неъматирайн.

ЗанначIа ﷺ хъамалу хъун  
Гъарнаца къашайссарча,  
Бусурман умматраха  
Дуаь чIяруну дара!

Мина тIи даралуву  
Хъхъурду дичлачи чIумал  
Заннайн ﷺ леххаву тIути,  
Идавсил ﷺ шафааьтрайн.

Къиямасса къинигу  
Бунагьирттая марцIну  
Бизан нясив бувара  
Учира ххира Заннахъ ﷺ.

Нурданул чанна лавхъсса  
Мадина шагърулуву  
ИдавсичIан ﷺ зиярат  
Бунан нанисса чIумал

Зиярат бан къавхъуну  
Минардай шатпа ливчIсса  
Циняв бусурманная –  
Жуя салам бусира!

Идавсил ﷺ чIарав гъаврду  
Нясив хъу асхIабтуряхъ,  
Бакъиь хIатталливуусса  
Цинявпапа агъулданухъ,

Равзалул лагма лавгсса  
Циняв малаиктуряхъ  
Жуясса салам бусан  
Хъамагу мабитари!

Къиямасса къинигу  
Шафааьт чIа учира  
Жула ххира Идавсихъ ﷺ  
Щалва цалва умматран.

Заннан ﷺ ххира хIажитал  
Дуаьлуву аманат  
Жу хъама мабитари  
Дуаьлух мюхтажцири.

ФатIима, ш. МахIачкъала

# Зуль-Хижжа барз

## Зуль-Хижжа зурул ххирашиву

Зуль-Хижжа барз хъанахъиссар бусурманнал яла ххирами зурдардивасса барзну. Хъиннува ххирастар му зурул хъхъичъсса ацъва гъантта. Му зурул 10-мур къини дикъайссар бусурманнал яла хъуннамур байран – Къурбан-байрам. Зуль-Хижжа зуруй бусурманнал байссар динналул ца аслуна хъанахъисса Хаж. Му зурул 9-мур къини Аьрафатрал къини хъанахъиссар. Му къини 1000-ва суратул-Ихлас (Къулгъу) бувккуну хъинссар. Идавсил ﷻ хадисраву бувсун бур, му къини азарва Къулгъу бувккунанал циняв бунагъру шюшайшиву.

## Хаж баву

Хаж – жулла динналул ххюлчинмур рукну хъанахъиссар. Аллагънал ﷻ жуйва ялув бувну бур каши духъурча оьрмулуву цал дунугу му рукну шаллу дан. Жунма му чак-зума кунма мудан буллан ялув бувну бакъар, мунил сапар захъиматсса бунутгий. Аллагъу Тааьланал иблис Цалва рахъмулия арх бувсса къинияцъа байбивхъуну му буссар Адам идавсил оьрчъру бйикъин бан, миннаву питнарду дан хларачат буллай, гайннал Къиямасса къини чирину лякъинсса амаллу къабаншиврул. Къамулсса Хажрах ва Оьмралух цуксса чири буссарив кълуну, Аллагъу Тааьланал хажитурал циняв бунагъру шюшайшиву кълуну, иблис бикъайссар личъи-личъисса багъанттайну муьминтал Аллагънал ﷻ хъхъичъсса му цалва бурж биттур бан къабитлай. Шъйтланнул хъунмасса хларачат байссар Хаж бан каши дусса инсан дунияллул захъиматшивуртгавух гъан увну, гъашину тгущава хажлив цукунчъав гъан къахъунссар, тисса кланайн утан. Халкъуннал душманнул тимур къабуллай, мунил хъирив къанай, муьминчувнал хъхъичъва-хъхъичъ пикри бан аьркинни Аллагънал ﷻ рязишиву ссаву дурих ххал дурну. Му бакъассагу, гъашину каши дунура Хажлив къалавгсса инсаннан хъиривсса шинал чара бакъа Хажлив гъан аьркинссар, буржлий арцу ласун багъарча-гума. Мухаммад Идавсил (с.а.в.с) хадисраву бувсун бур каши дунура хаж къабувну ва дунияллия лавгсса инсан иман дакъа лагаврия хъуннасса нигъ душиву. Жухъва хаж баврил даражалия бусласисса чъавусса хадисру буссар: «Аллагънал къамул бувсса Хажрахсса чири – Алжанны». «Къабалучан Хаж бувма ниттил увсса къини куну бунагъирттая марцъ хъунтлссар». Ялагу Расуллагънал ﷺ увкссар: «Къабалучан Хаж буллаими – Аллагъу Тааьланал хъамалли. Гайннал чъа кумур Заннал ﷻ дулунтлссар, тавбагу къамул дурну, бунагъру шюшинтлссар. Аллагънал гайннал дуьртта хъхъун жавабгу дулуну, шафааьтгу биян бантлссар».

## Хажлив наниманансса насихат

Хажлив ачин хладур хъанахъисса инсаннал мунил агъамшиву вив ларсун, цанна хъуна дакъинтлссар захъиматшивуртгу духъан хладурну икълан аьркинссар. Хажрал жунма дакъинин бутлатиссар та-бунугу гъарца инсан ванияр цукссагу лахъисса ва захъиматсса сапар-даннин – ахиратлувун лагайшиву. Къамулсса хажрал ахиратравунсса сапаргу хъинну бигъа бан буюхайсар. Мунияту, хажлив ачин ччисса инсан ххулли уккан-



нин, циняв цалва бунагъирттая тавба дан аьркинссар. Мукунма, гъан-маччаминная, чъахху-чъарахная, динналул уссу-ссунная хлалашивуртту ласун аьркинссар. Вилва ялув арцуйнусса ягу цамур хъуслийнусса буржру бухъурча, мигу зана бан аьркинссар. Кулпат-оьрчъру бусса адиминал цува зана хъуннин гай ялапар хъунсса арцу-хъус къадитан аьркинссар. Буюхлай бухъурча, ххуллих вищалла чансса ххисса арцу ларсун хъинсар, иш багъарча динналул уссу-ссуравран кумаг баншиврул, цанчирча, Хажрал ххулли харж дурсса гъарца къурушрах хъинну хъунмасса чири бунутгий. Хажлив нанисса группалул бакъчину увчуну хъинсар хъхъичъвагу Хажлив ивксса, мунил хлал кълунсса инсан. Мукунсса инсан акъахъурча, арцух увгунутума удин бучииссар. Бакъчи увчуну махъ гъарца ишираву ганайн мюти хъанан аьркинссар.

Зуцалва ца автобусраву, самолетраву вагъгабистътал къабагъан бурувчуну бикъияра. Миннащал архлал агъманал щалва ххулу баястру буллай гъантлссар, миннан Аллагъ ﷻ кълчъ лагавунияр гъалгъарду баву ххирану бунутгий. Му бакъассагу, вагъгабистътура-щал Хажлив нанисса инсаннаца ххуллих хъуна бакълакисса чъавусса зияратирттай иян ва цаймигу хъинсса амаллу бан къабуюхъантлссар. Шавату увккун ачиннин кълра ракааьт суннат чаклил дурну хъинссар. Цалчинмур ракааьтраву «Альхамрал» хъирив буккайссар сура «Аль-Кафирун», кълчинмуниву – «Къулгъу». Салам буллуна махъ дуаь дурну Аллагъу Тааьланахъ Хаж бансса, захъиматшивуртту духъансса къудрат ва ссавер чъа учайссар. Яла «Бисмиляги таваккалту аьла-Ллагъи ва ля хлавла ва ля къуввата иллия биллагъ» учайссар. Яла махъминнахъу хъинну бики, Аллагъ ﷻ дакъний увгъуну бики куну, дакъ дияйсса садакъагу бувну, ххуллих укканссар. Нанисса чъумалгу Аллагъу ﷻ дакъний увгъуну, ахиратрал ссапаргу дакънийн бутун, ци чичру дучавивав, ци хлукму хъувивав, мурадран иянавав, къаиянавав тий, нигъал ва хъулданул дянив, цалла исламрал рукну барт лаган дан къастти-рай ачинссар. Дунияллул хъус-хъиншиву, хъуншиву каккан, кланттурду ккаккан, дахху-ласу дан, цува хажжи хъуну халкъуннаву хлурмат буну икъланшиврул гъансса нийят дикълан къабучииссар. Укунсса нийятрай хаж банна тий лавгсса инсаннал хаж къамул къашайссар тий бур. Хаж буллалисса муьминчу Макка-Мадиनाव лавгукун, Исламрал рукну биттур даву бакъасса, Мухаммад Идавсичан ﷺ зиярат бангу буюхлай бур. Му хъанахъиссар яла ларайминнува ссабадатнугу, хъинну агъамсса суннатнугу. Ца-цавай аьлимтурал тимунин бувну Хажлив лавгсса инсаннан чара бакъа Идавсил ﷻ гъаттайн зиярат бан аьркинссар. Расуллагънал ﷺ увкссар: «Хажливгу увкун, ттучан зияратрайн къаувкълманал ттул чулухуннай хъуннасса адав дакъа-ашиву дуллалиссар», - куну. Цамур хадисраву увкуну бур: «На дунияллия лавгун махъ ттучан зиярат бан увкма, ттул оьрмулуву ттучан увкма куннасса. Ттул гъаттайн зиярат бан увкманан чара бакъа ттул шафааьт биянтлссар». Мухаммад Идавсил ﷺ зияратрай дурсса дуаьгу Аллагъу Тааьланал къамул дайссар Идавсил ﷻ ххирашиврухлуна. Аллагънал ﷻ кумаг баннав каши дусса жулва уссуравран ва ссуравран махъун къабувтун, шайкун анаварну къамул хъунсса куццуй, камилну Хаж бан. Амин!

Камал Сагидов

# Гъумучиял Хъун Аьлил ирсирав бутла

Хадисраву бур «Аьлимтал Идавтурал варисталли», - увкуну. цанчича, идавстурал цаярда махъ элму дакъа цамур хъус къаькадитайссар, му элму ларсмагу гайннал варис хъанахъиссар. 15-мур ттуршукулий Гъумук ялапар хъанай ивкссар Хъун Аьли тисса аьлимчу. Ганал цъа чъавусса бусурманнал хлукматирттай машгъурну диркссар. Га хлалану ивкссар бусурманнал халифатраву хъунисса аьлимтуращал. Дагъустаннайгу Аьли халкъуннаву хъинну цъа дурксса, хлурмат бусса аьлимчуну ивкссар. Жучанма бивну бур ганал чивучусса «Фулуки», «Мухтасар», «Дурар аль-асфар» ва «Варир аль-Зафар» тисса лутгирду. Цаннаса чъумалгу циняв Дагъустаннал мадрасарттаву ва Исламрал институтирттаву хъхъичъва-хъхъичъ буккайсса лу хъанай бур «Мухтасар». Ва лутгираву бувсун бур тавхидрал, фикъгъилул ва тасавуфрал гъанурдая. «Мухтасар» бивкссар Дагъустаннал ва Кавказнал миллатирттал мазурдийн таржума бувну. Хъун Аьли ивкссар гъижралул 935-ку шинал, увчуссар Гъумук. Га увчуну ивксса хлатгалу цъана лирчун дакъар, гикку Совет хлукматрал чъумал колхозрал ферма дурну, къялабарзругу чъиртгу бан ишла бувну бивкълун бур. Хъхъичъра Гъумучиял шяраву бусурманнал Байраннал гъантрай Аьлил гъаттайн зиярат байсса аьдат диркун дур. Мукунма, хъунмасса хлалай гъарал къалачълачъисса чъумалгу ганал зияратрайн лавгун Аллагънай ﷻ лабизайсса бивкълун бур, ганайхъин тавассул бувну. Мукун дурсса дуаьлухъуну жаваб къадулуну къаличъайва тлар. Га хъуннаса аьлимчунал барачат жуйнмагу бияншиврул, жушавугу ганал элмулул бутла ласун хъуншиврул, «Мухтасарданул» мяъналул таржума ришлай буру.

## Китабул Мухтасар

Бисмиллагъи-р-рахъимани-р-рахъим, Аьлхамдулилагъи раббиль аьламин. Ва-с-саламу аьла мухаммадин ва аьла алигъи ва асхъабигъи ажмаэн. Муниар махъ. Ва лу кутла бувссар фикъгъилул ва цаймигу лутгирдава Имам Шафигънал мазгъабрайн бувну, Аллагъу Тааьланал цай цими бишиннав. Ва сакин бувссар дин кълул дуллай байбихъ-лахъиминнан бакълахъруну хъуншиврул ва дакъних лахъхъин бигъа бан. Аллагънаяри ﷻ кабакъавугу.

## Имандалул, Исламрал ва суннатрал лу

Кълуну икълу, диндалул аслу шанма буссар: иман, ислам ва суннат. Иман цери чирча, му ина иман дишавури Аллагънайн ﷻ, малаиктурайн, лутгирдайин, идавстурайин, Къиямасса къинилийн, къадарданнийн – хъинсса биклу, оьсса биклу – гъарзад Аллагъу Тааьланаятури, куну. Аллагънайн ﷻ иман дишаврил мяъна тлурча, му ина дакъ



дарцуну икълавури хлакъну Аллагъу Тааьла ушиврий Цувалусса цама шарийк акъасса, дайди хъу-аввал дакъасса, уттанавасса, тачъав къаивчъайсса, абадлийсса, мукъах личантлссар. Аллагъ ﷻ тачъав ухкъалавгссар ва ухкъалагантлссар. Аллагънан ﷻ гъарзадрал члурду байяссар, гъарца зад члалачииссар, гъарца зад кълунсар. Аллагъ ﷻ гъалгъатимари, Ахиратраву муьминтуран ккаккантимари, гъар-

задрал къудрат думари. Аллагънал ﷻ ирадат-къаватрайну ххуймургу оьмургу шайссар, амма оьмуний рязи акъассар. Ялагу ина дакъ дацан давури Аллагънал ﷻ цинярда сифатру: члалачиману, баяйману ушиву ва цаймигу сифатругу дуссар аввал-дайди хъу дакъасса. Аллагъ ﷻ щихачъав ва ссахачъав къалавхъ-хъуссар, Аллагънаха ﷻ лархъхъуссагу цичъар дакъассар. Ялагу ина дакъ дарцуну икълавури Аллагънал ﷻ усса клану ягу чулухалу бакъашиву. Аллагъ ﷻ замана лагаврийну аххана къашайшиву, ва Аллагънан ﷻ замана баххана къашайшиву. Ялагу ина дакъ дарцуну икълавури Аллагънал ﷻ щалва аьлам, халкъ ляхъан бувшиву, миннавасса цаппара даин личан, цаппара пана хъуну литгун бан. Аьрш, Курс, Лавхул-махъфуз, Къалам, Исрафил-малаикнал сур, Алжан-Дуржагъ ва миннуву думур - ляхъан дурссар даин личан. Рухлугу даин личантлссар Имам Шафигънал тиймунин бувну. (гхунмайгу буссар)



# Инсаннал рухІ ласайсса куц

Мукьилчинмур ссавний ца хъунмасса мусил тахлий щяивкІун хъунасса малаик уссар Малакул-мавт тІисса. Мунал бакІгу аьрщул РахІманнул лув дирну дуссар. Ччаннугу мура лувсса арулчинмур лухччинийн бивну буссар. Мунал кару-гу машрикьрайнгу, магърибливгу диллай дуссар. Мунал мукъра лажингу дуссар, мукърагу чулухуннайгу дурургун. Гъарца лажинрал лахьшивругу ххюттуршра шинал ххуллу буссар.

**М**у малаикнал хъхьичІгу буссар ца хъунмасса мурхъ, щюллисса чІапІив бусса. Гъарца чІапІул лувгу ца-ца ахъулсса дуссар. Мий гъарца чІапІуйгу чивчуну буссар – ва чІапІигу ва ахъулссагу пуланнал арснал пуланнали, ахъулсса мунал ризкъи-маэшатри, чІапІи мунал бивкІури, – тІий. Му малаикнал хъхьичІгу дуссар ца хъунмасса мусил ула ЛавхІул-МахІфуз тІисса. Мунил лахьшивругу утгашивугу ххюттуршра шинал ххуллу буссар. Муний гъарца халкъуннал цІардугу дуссар. Диванул ХІафазатъгалгу буссар, цувагу муних урувгна уссар. Мунал урчІа чулухгу буссар аьдад дакъа чІавусса малаиктал, марцІсса марххала кунма кІяласса. Ми цІимилул малаикталли. Киямур чулухгу буссар микссава цІансса хъхъу кунма лухІисса малаиктал. Мий аьзаврал малаикталли. Утти, адиминал инсаннал



ризкъи-къисмат, буканмур бухлавгукун, ажал бивукун га мурхьирайсса чІапІигу, ахъулссагу дагъайссар. Яла, му Малакул-мавтнал мунал цІа ххал дурну га ултгарай, мунийхгу къалан бувккун лиххан дайссар. Яла ми муначІасса малаиктал буххайссар мунал чурххавун, рухІ ласун. Миннал кІункІу дуллай мунал рухІ ччаннал кІиссуртгава тІайла хъуну къакъарттуйн диян дайссар. Малакул-Мавтнал канихъ ца ччала буссар Магъриб – Машрикьрайн бияйсса. Му бищайссар му инсаннайх. Яла дуккайссар мунал рухІ. Алши бусса муьминчув ухъурча, му рухІ дуккайсса чІумал Жабраил малаикнал хъа ялтту дикІан дурну, мунал цанма ал-

жаннаву бикІантІисса манзила, неъмат чІалан бикІайссар. Мунихсса шавкъирал муних урувгнагу личІайссар, цалва агълу-авладрах къаургавай. Мунал рухІгу цІимилул малаиктурацал сунттул задраву кай-кай дурну Элиюн тІисса хъинминнал рухІру дикІайсса кІанттайн имандалуцал алжаннавун лахъайссар. Ччитари чурххачІангу дукІлай, гъаттавату изан аннин неъматраву дикІайссар му алжаннаву. Разакъаналлагъ. Оьсса, алши бакъасса ухъурча мунал рухІ дуккайсса чІумал Жабраилул цалла киямур хъа ялтту дикІан дурну мунал цанма дуржагъраву бикІантІисса манзилагу аькъубагу чІалан дикІайссар. Мунияту нигъа усаврил муних урувгнагу

личІайссар, цалва агълу-авлад хъама бивтун. Мунал рухІгу аьзаврал малаиктурацал, цалва оьсса аьмалдануцал цІарал кутавраву кай-кай дурну Сижжин тІисса дуржагъравун лагайссар. Къиямасса къини дучІаннин аьзавравугу икІайссар. Аьзаналлагъ. Ялагу тІий бур, муьминтурал рухІру кІяласса лелуххантрал хъаттирдалу дикІайссар, кафиртуралсса лурда-лувсса арулчинмур лухччиний дикІайссар – тІий. Кунналгу тІий бур – Идавстурал рухІру Жаннату-аьднин тІисса алжаннаву дикІайссар, алши буминналсса Элиюн-алжаннаву дикІайссар, аьлмтуралсса Фирдавс алжаннаву дикІайссар, гъазийтуралсса алжаннавух лехлай занай дикІайссар цанна ччинийн, – тІий. Бунагъругу буллай бивкІсса, амма иман дусса муьминтурал рухІру я лухччиний, я ссавруннай дакъа гъаваллаву дарцІуну дикІайссар, Къияматсса къини дияннин. Муьминтурал оьрчІалсса мискирал зунттаву дикІайссар. Чапуртурал рухІру Сижжин дуржагъраву дикІайссар, Къияматсса къини дияннин чурххардицал аьзаб дуллай. Утти, инсаннал рухІ дуклакиний оьсса икІу, хъинсса икІу миннал сакара куннал захІмат байссар, куннал бигъа байссар. ХІатта муьминтуралссагу кунналсса рухІ ненттабакІгу гъухъа бивтун, захІматну ласайссар. Миннай бунагъру ливчІун бивкІхъурча, миннул

мукъабилданий мий яла гъан баншиврул, рухІирачІа сакара захІмат байссар, яла Алжаннул неъмат гъарза баншиврул. Чапуртуралсагу кунналсса бигъану ласайссар мий дуняллий халкъуннал хъинмур байсса бивхъурча. ЛитІайний мунил мукъабилданий сакара бигъа бивну, дуржагъравун бакъайссар. БивкІулул сакаралул азаллий ряхттуршлий къуния мукъва буруккинзахІмат буссар. Мий ца лухччинийн бутарча циняв халкъ литІунссия мунил цІакъшиврул. Ялагу азарва сакара буссар бивкІулун ца-ца сакара азарада тур рирщуссаксса захІматссар. Азарилла ххарачІанттул ххуку увссаксса захІматссар. Азарилла щаращисса кІункІурдун увтссаксса захІматссар. РухІ ласласиний ччаннал кІиссурттавату дай дирхъуну, чурххавух ларай кІункІу дайссар. Изряиллул хъинну сситтуйну кІункІу дурну ца базулия ца базулийн дияннин азарда тур рирщуссаксса, азарва ччала щуссаксса захІмат буссар. Му чІумал базурдалгу куннил куннихъ хъинну бикІу учайссар. ХІасил, инсаннал рухІ ласайсса чІумал мунал ккаккайсса захІматрал хъуншивругу бусан къашай. Му чІумал ккаккантІисса захІмат инсаннал кІулссания, мунаща дуняллий маэшат бан къахъунссия, мунил буруккиттарал.

«НасихІатуль аьвам»

## Тива цу зана хъуссар?

Телевидениелевух ца передачулу ттун бавуна укунсса хавар: ниттил лякълуву кІива оьрчІ бивкІун бур ихтилат буллай. Ца ивкІун ур, иман дусса, гама – дакъсса.

Иман дакъама: «Ниттил лякълува бувккун махъгу оьрму бикІансса ххай урав ина?» Иман дума: «Щак бакъа бикІантІиссар. Жува шиву буссару хъиривмур оьрмулуву яхъун биялсса гуж хъуннин хІадур хъанай. Иман дакъама: «Ина ци тІий ура! Ссайн вих хъанай ура? Мукун бикІан къабюхъайссар! Вин кІуллив та оьрму цукунсса бикІантІиссрив?»

Иман дума: «Ттун гъарзад къакІулли, амма жува жулва ччаннай занантІиссару, та оьрмулуву чани бикантІиссар, жува жулва къацІлих дукра канантІиссару. Иман дакъама: «Ина ци магъри буслай ура. Цалва ччаннай занан ва цалва къацІлих дукра канан щица шайссар? Жуйра цІун циван дусса ххай ура, ванивухрихха дукия нанисса. На вихъ цал уттигу учин ччай ура: ниттил лякълува бувккун махъ цукунчІавсса оьрму бикІан къабюхъайссар!»

Иман дума: «На вихну ура та оьрму цІанасса оьрмулуяр ххуйсса бикІаншиву. Тийх гъарзад цамур куцшуй бикІантІиссар, му жулва аькъулуйну бувчІин шайсса зад бакъар».

Иман дакъама: «Ина ци тІиссара. Тива зана

хъусса цучІав акъархха! Жува лякълува буккайхтту оьрму кьуртал хъунтІиссар. Щалва оьрму цуппава – цІаннавусса аьзаври» Иман дума: «Ттун къакІулли та оьрму цукунсса бикІантІиссарив, амма на дакІ дарцІуну ура тиву жуна нину ккакканшиву. Ниттил жухара аякъа дантІиссар». Иман дакъама: «Нину? Ина ниттийн вихрав! Нину духъурча, ккаккан да ттун му!» Иман дума: «Нину дакъассания жуцава яхъун, суккувагу хъун къабюхъантІиссия». Вих акъама: «ЦукунчІавсса нину дакъассар. ДиркІиссания му ттун цаллагу ккакканссия!».

Ва магъа кунмасса бусала бавукун, ттун дакІнин агъуна ца инсан: «Вин ци кІулли ахиратраву ци дикІантІиссрив, тива зана хъусса цучІав актассархха», – тІисса. ЧІавучин, укунсса суал буллалими бикІай цивппа бусурманнан кқалли буллалисса, амма гиччава гиккун хъунисса бунагъругу байсса. Хъунасса аьлимчу Ибну ХІажар аль-Аскъаланил чивчусса «ФатхІул-Бари» тІисса луттираву увкуну бур: «Бунагъриттал инсан чапуршиврийн кІункІу айссар, мунияту мудан бунагъру буллалима иман дакъа ва дуняллия лагаврил нигъ дуссар». Цинявппагу бусурманнан ялувссар Аллагу Тааьланил хІарам бувмур баврия архъун хІарачат буллан, цалла иман дуруччиншиврул. Аллагънал ﷻ кумаг баннав!

макъала: Ибрагъим-ХІажи Ибрагъимов

## Къурбан-байрам

1 « ХІайван биххайсса чІила ххуйну даил дурну дикІан аьркинссар. Биххан хІадур бувсса хІайвандалун чІила ккаккан дурну, ягу ца хІайван гайминнун чІалай бивххун къахъинссар.



Къурбан биххайни цал «Бисмиллагъи-р-рахІмани-р-рахІим. Аллагъумма салли аьла МухІаммадин ва аьла али МухІаммад» учайссар, яла укунсса такбир буккайссар: «Аллагу акбар. Аллагу акбар. Аллагу акбар. Ла илагъа илла лагу ва лагу акбар. Аллагу акбар ва лиллагъил хІамд. Аллагу акбар. Аллагу акбар. Аллагу акбар. Ла илагъа илла лагу ва лагу акбар. Аллагу акбар ва лиллагъил хІамд. Аллагу акбар. Аллагу акбар. Аллагу акбар. Аллагу акбар. Ла илагъа илла лагу ва ла-

гу акбар. Аллагу акбар ва лиллагъил хІамд. Аллагу акбар. Аллагу акбар. Аллагу акбар. Аллагу акбар кабиран, валь-хІамдулилагъи касиран, ва субхІаналлагъи букратан ва асила. Ла илагъа илла лагу ва лагу акбар. Аллагу акбар ва лиллагъил хІамд», - куну. Яла хІайванналул ччаннугу дархІуну, га саргъунну куямур чулий утту бишин байссар, Къиблалул чулинмайгу бурган бивну. Яла дуаь дуккайссар: «Аллагъумма гъаза минка ва илайка фатакъаббаль минний. Бисмиллагъи, Аллагу акбар. Аллагу акбар салли аьла МухІаммадин ва аьла али МухІаммадин ва саллим». Къурбан-байрамрал къини садакъа буллай, гъанмаччаминначІан, чІаххурачІан хъамалу занай, ливтІуминнал гъаттардийн зиярат буллай, хъамал къамул буллай, кунналку барча буллай гъан дарча, хъунмасса чири шайссар. Аллагънал ﷻ тавпикъ булуннав! Амин.

### ТалихI ссаву буссар?

ТалихI ссайн учайссар, кусса суал булурча, гьарцаннал личи-личIину, цалва даража-тагьарданин буну жаваб дулай. Радио-телевидение-лувух, кказит-журналлай чIярussa хьунабакъавуртту, цIуххавуртту дай му масалалул хIакъираву. Цавайннал учай талихI кулпатраву, оьрчIаву буссар, куну. Цайминнал учай нитти-буттаву, гьан-маччаминнаву буссар, куну. Вайминнахъ цIуххирча, талихI марцIсса ссавниву буссар тIар. Букасса ччатIгу, хIачIансса щингу духьурча, мунивури талихI тIиссагу бикIай. Ца-цавайннал учай чурххал цIуллушивури талихI, куну. ЧIявуминнал пикрилийн буну, талихI бур так дуняллийсса аваданшивруву. Ххуйну пикри барча, вай циняр талихIран ккалли бувсса неъ матру бур багъа лагьсса, чIумуйсса.

макъала: Абдуллагь Ибрагьимов

Инсаннал хIакъсса талихI хьанахъиссар Исламраву ушиву ва Аллагьнал ﷻ амурду биттур баву, хIарам дурмуния махъунай шаву, Заннайн ﷻ мютIийшиву, дакI дуняллувумуния дяркъусса лагъну икIаву. Мьяжаннугу инсан талихI бусса ягу бакъасса икIаву чичайссар га ниттил лякълуву унува, 40-ва гьантта хьувкун. Ци чивчуну буссарив ца Аллагьнан ﷻ бакъа къакулссар. Бусурманчуну ушивруяр хъунмасса неъмат бакъассар. Мунин буну, талихI хьанахъиссар Аллагьнал ﷻ жунма къисмат бумур, жулва чулуха цукунчIавсса къудрат дакъанура. Бусурманнаву бикIайссар вайминная талихI буссагу. Масала, дакIнихтуну вайминнайн Исламравун оьвтIисса, Аллагьнал ﷻ хIукмурдай рязину, мютIийну усса инсаннал дуллалимур циндилттал ца чулух, шалла дунял ва дуняллуву думур вамур чулух диширчагума, мунал амал кIуну лякьинтIиссар. Цанчирча, Къиямасса къини Аллагьнал ﷻ гьарца дуняллул неъматрах хIисаб-суал бантIиссар. Кьуръанналуву дуссар укунса мяъна дусса дуаь: «Я Аллагь! Ина ттун ва дуняллийгу ахиртаравугу хьинмур дула!», - тIисса. Ца-цавай бюхъай ххай бикIан ва аятраву дуняллул аваданшиву чIа учин лахъхьин буллалисса. Ванил мяъна цири чирча, ахиратраву хьинну лякьинмур дуняллий дула, тIиссар. Инсаннаца маэшатраву ци-бунугу къахъанай бухьурча, халкъуннал учай ва талихI бакъасса, барачат бакъасса ур, барча бакъу ур, куну. Дуняллуву циксса баларду, аькъубарду, мискиншиву диярчагу, инсан тIайласса динналул ххулу бугьуну най ухьурча, му талихI бакъасса ур учин къабучIиссар. Ялагу махIатталсса зад – жуна маччасса инсан ци-бунугу ца бунагь байсса, масъала, къалиян учайсса, хIан хIачIайсса, цурк байсса ухьурча, жунма му иш бигъану чIалан бикIай, ганан кумаг бангу анавар къабуккару. Амма дуняллул, маэшатрал иширттаву захIматшиву хьурча, шалва тухум батIай ганан кумаг бан. Мьяжаннугу кумаграй мюхтажма хьанахъиссар кIа цалчинма бунагькар, кIанан кумаг бангу хьхьичIва-хьхьичI хIарачат бан аькинссар. Муният, талихI ссаву буссар тIисса чIумал, бусурманнан аьркинссар му Аллагьнайн ﷻ мютIийшивуруву, Исламраву ххал бан. Аллагьнал ﷻ жува хIакъсса талихI буминнаву хьун баннав! Амин!

## Дахху-ласулул цаппара шартIру ва адабру

Имам Тирмизил бувьсса хIадисраву увкун бур: «ТIайлашиву дуруччайсса маша-чи Къиямасса къини идавсту-рашчал, сиддикьинтурашчал ва шагьидтурашчал икIантIиссар», - куну. ХIалалну цалва кулпат шаллу банмур лякъаву бусурманчунвал буржну хьанахъ-иссар. ХIадисраву увкун бур: «Инсаннал бикIайссар бунагьру, цалва кулпатрай аякъа даврийну бакъа къашюшайсса». Ялагу МухIаммад Идавсил ﷺ увкуссар: «ХIараммур канай инсаннал чурххай хъусса дикIун яла лайкъмур – дуржагьрал цIури», - куну.

макъала: Шарип МухIаммадов

Гьарца дахху-ласу дуллалисса бусурманчунвал кIулну дикIан аьркинссар мунил шартIру цирив, хIалал-хIарам цирив, закат цукун хIисав байссарив, ва маша баврихун бавхIусса циньявпагу шариаьтрал хIукумурду: ХIарамссар ккаччи, дунгъуз, хIан, наркотикру ва цайми миннуха лархъхъусса, ишла дан хIарамсса задру дахлан. Дахлахисса задрай диялдакъа-шивуртту, аьйрду духьурча, гай къюлтI дуллан къабучIиссар, цуксса чIирисса аьй дунугу бусан, загьир дан ялувссар. Ца чIумал МухIаммад Идавс ﷺ ччатI машан ласлай ивкIиссар. ЧчатI лувату хъавтесса лявкъуссар. Идавсил ﷺ цIувххуссар ччат баххухъ: «Ва цукун атил хьур», - куну. Ганал бувьссар ччатI гьарахъхьун биривну атил хьушиву. «Туну ина ва атилмур чул лавайну циван къабишав?», - куьсар Расулуллагьнал ﷺ. МухIаммад бин Сайрин ивкIун ур тта бахлай. Ласул цIувххуну бур: «Ванил цидунугу диялдакъашиву дури?», - куну. «Дур, увкуну бур ганал, ванил лазуни дирчусса зад ссан щIлай ссуку дуллан бикIай», - куну. МухIаммад бин Мункадир тIисса адимина ивкIун ур базаллуву кIива гьухъа бахлай: ца ххюра диргьамран, гамур – ацIра диргьамран. Заллу тинай хьуну унува, ганал къуллугьчинал ххюра диргьамрансса гьухъа ацIуннин бавххуну лявкъуну бур. МухIаммад шаллусса

къини га инсаннах дуглай ивкIун ур, лявкъукун увкуну бур: «Ттул къуллугьчинал ххюра диргьамрансса гьухъа вин ацIуннин бавххуну бур», - куну. «На му багьлуй рязину ура», - жаваб дуллуну дур ванал. «Ина рязину ухьунссара, амма на рязину акъара, ттунма хьуну къаччимур вин бунутIий. Ачу ягу ацIра диргьамрансса гьухъа ласи му зана буну, ягу на вин ххюра диргьам зана данна, акъа-хьурча, гьухъа махъунмай буллуну, вилла ххюра диргьам ласи. Вай шамуннива ца дурчIа», - куну бур



МухIаммадул. Гьухъа лавсманалгу гьухъагу цанма бивтун, ххюра диргьам махъуннай ласун рязи хьуну ур. Мукум тIайлану дахху-ласу дайссар Аллагьная ﷻ нигъа увьсса, тIайлашиву дусса машачинал. Циндилттай хIиллакаршиву давугу хIарамссар, му хъунмасса бунагь хьахъиссар, зулмуну хIисав байсар. КъабучIиссар цалла дахлахисса хъуслия хьиннура гужсса цIарду дуллай, ганиву дакъасса сипатру ялув дихълан. ЩIялмахъсса хъа баву хьиннува оьккиссар. «ЩIялмахъсса хъа буну дарххусса хъуслия барачат къабияйссар», - увкуну бур хIадисраву. Идавсил ﷺ жухъва бувсун бур кIюрххил ччяни бувсса машлуву барачат бикIайшиву. Базаллуву хъус дахлалиманал чIун аьдада гьан къаданшиврул цахъва цала зикри-салават ккаларча хьинссар, машлувух лавгун чакру махъун бичлан къабучIиссар. Цайминнал маша вилваняяр

ххуйну най бухьурча, гайннай дакI мяш хьанан ихитяр дакъассар. Аллагьнал ﷻ чивчусса къисмат къабувкIун къаличIантIиссар. Ца чIумал Аьли-асхIаблул ﷺ ца инсаннайн тапшур буну бивкIссар варани бугъан цува чак буну учIаннин. Чакгу буну, варани бугьуманан дулун кIира диргьам-гу канил дургьуну махъунай зана шайхтту, ганан ккавкссар га инсаннал варанигу бусса кIанай къабивтун, ганийсса хьхьуригу дарцуну ливхъшиву. Аьли-асхIаблул ﷺ цама инсан гьан увссар кIира диргьамгу дуллуну, базаллува цамур хьхьури машан ласун. Базаллуву ганан лявкъуссар гава инсан дарцусса хьхьури кIира диргьамран дахлай. Ваналгу ганаща хьхьуригу ларсун зана хъуссар. Бувьссар Аьли-асхIаблул ﷻ хьхьури щища ларьссарив. Аьли-асхIаблулгу ﷻ увкуссар: «Цалла ссаву дакъашиврул цIаний хIалалну лякьин шайсса кIира диргьам хIарамсса ххулий ляркъунни». Багъа ялавай ба тIисса ухьурча, винма зарал къахъунну къюкьин даву суннатссар, ласайманангу къюкьин да учаву суннатссар. Амма ласласиманан къабучIиссар ялун агьну хьиннура къюкьин дува тIий ацIан. Вишара зад машан ларсма пашман хьуну махъуннай зана да тIий учIарча, зана давугу хьинссар. Мукум дайманан Аллагьнал ﷻ Къиямасса къини бунагьирттал аьфву байссар. Жулва маэгабрай буну, дахлахиманалгу ласласиманалгу чара бакъа «на даххав», «на ласав» учин аьркинссар. ХьхьичI дахлахиманал тIий ухьурча, ганал учинссар: «На вин ва зад даххав ваксса багьлун», - куну. Ласласиманал «на ласав» учаву гьассар. Мукум, ласласима хьхьичI тIий ухьурча, «На вища ва зад машан ласав ваксса багьлун» учин аьркинссар, дахлахиманал «на даххав» учаву гьассар. Вай махъру къаучирча, шариаьтрайн буну маша бувссаннун хIисав бакъассар. Аммарив, ххира дакъсса, багъа лагьсса зад ласласисса чIумал вай махъру къаучирчагу бучIиссар. Аллагьнал ﷻ кумаг баннав дахху-ласулуву тIайлашиву дуруччин! Амин!

## Букайсса ва къабукайсса хIайвант

ХIайвантрава букан хIалалсса хIайвант хьанахъиссар: ятту, варантту, дучри, гьаттара. Амма, чу бивххуну букан карагьаттсар тIийгу бур, гьазаватрай ганий буртти икIайнутIий.



Бюрни, урттил ттуку, гьинта, кавтар, бюрх, цулчIа, хьхьувайсса, киш, шинжаб – хIалалссар. ДикIуй, нисрай, ахъулссанний, цамур дукайсса задрай хъусса шатта-чатIи – хIалалссар. Аьнаки, ажари, къахъну, къаз, урдак, индушка, варани-челму, къукъухъхи, булбул чIелму, хьурсул дакIи, далу, ххюнчIа, хьу дукай хьатIу, чIелму ва гьарца чIелмулул суратраймур, гьарца къюлтI къакуна, ссихI къалавсна чIу буллай, ссука бурувгун щин хIачIаймур хIалалссар. ХьацIгу хIалалссар. Хьхьиривусса, щинавусса гьарца хIава, хIайван хIалалссар, щин дакъа хьунмасса хIаллай яхьун къашайсса бухьурча.

Букан хIарамсса задру: дунгъуз, ккаччи, ччиту, ттуку, вилцIунни, барцI, цуша, пил, маймун, шатта, аькъраб, кIулу, ттаркъа, чакьал, къулчча, барзу, бакI хьахъу, хьатIу, къарчигъай, лачин, къьиргъу, итаргу, къягъу, аькъ-аькъ, тIавус, ххюндараки, зимиз, най, гьангьаратIи, гьарца ушу-шулгьи. ЩIнавуугу, къьирйгу яхьун шайсса хIайвант циньявпагу харамссар. Мукум, гьарца инсаннан душманшиву думурди, гьарца ххутIив, бумурди хIайваннуйн ххяххайсса. Оькки бизайсса къабукаймуниха лавхъхъусса бухьурча къадурьуссар. Букаймуниятугу къабукаймуниятугу лявхъумургу хIарамссар. «НасихIатуль-авьам» («ГьунчIукъатIан»)

## Дагестанский Исламский университет имени шейха Мухаммад-Арифа

Объявляет набор на вечернее отделение, где все желающие могут без отрыва от производства или учебы бесплатно получить духовное образование. Получив исламские знания, Вы принесёте в свой дом и общество неиссякаемый свет добра, исходящий от Ислама. Это поможет Вам совершать благие деяния.

На учебу принимаются все желающие (от 14 лет) на основе собеседования.

Мужчины и женщины проходят обучение раздельно.

Срок обучения: Программа трех-годовалая.

По завершению учебы желающие зачисляются на дневное отделение ДИУ.

Обращаться по адресу: г. Махачкала, ул. Дахадаева, 136. Дагестанский Исламский университет им. Шейха Мухаммад-Арифа (на территории Центральной мечети), городской корпус, 5-этаж. Занятия начинаются с первого октября.

Телефоны для справок:  
для мужчин: 8-988-771-10-20;  
для женщин: 8-988-420-46-48.



Аллагьнал ﷻ, идавстурал царду зумух ласайхтту ци учайссар?

Аллагьнал ﷻ цѝа учайхтту «субханагьу ва тааьла» учайссар, Мухаммад Идавсил ﷺ цѝа зумух ласайхтту салават рутайссар «саллалагьу аьлайгьи ва саллам» ягу «аьлайгьи-с-салату ва-с-салам» увкуну, цайми идавстурал цѝардал хьирив «аьлайгьи-с-салам» учайссар. Асхлалнал цѝа учайхтту «разияллагьу аьнгьу» учайссар. Парикьатрал шайхнал цѝа учайхтту «кьуддиси сирругьу» учайссар.

Бучиссарив чакливу «аттахийят» ккалаккисса чѝумал кѝисса бувагу гьаз къабан?

Имам Шафийнал мазгьабрайн бувну, чакливу кѝисса гьаз баву суннатну хьанахьиссар. Кѝисса гьаз байссар «иллаЛ-лагь» тѝисса чѝумал ва салам булун кьуртал хьуннин ялавай ита къабавкьуну, бувгьуну ацѝаву хьинссар. Бувагу кѝисса гьаз къабарчагу, чак хѝисавссар.

Бучиссарив Кьурбан бихханшиврул цамур шагьрулийсса инсан вакил ан?

Бучиссар.

Зума дугьан къабучѝисса гьантри цумири?

Зума дугьан хѝарамсса хьюва гьантта буссар: Зума ритавал кьини, Кьурбан байрамрал кьини ва кьурбан байрамрал хьиривсса 3-ма ташрикьрал гьантта – айьму-т-ташрикь.

Бучиссарив закѝат ттулва гьан-маччаминнан булун?

Закѝат булун къабучѝиссар оьрчѝал нитти-буттан, нитти-буттал оьрчѝан, ласнал щарссанин, цанчирча, гай укунмагу щаллу бан ялувссар. Уссин, ссин ва цаймигу мискинсса гьанчунан закѝат булун бучѝиссар.

Магьар бихьлахьисса чѝумал бардултну (свидетель) хьамитайпа бикѝан бучѝиссарив?

Магьар бишаврил цѝа шартѝну хьанахьиссар кѝия бара – адимина икѝаву. Шариатрайн бувну, магьар бишайни хьами бардултну дуцин къабучѝиссар.

Ттун бавссар арцул тѝахѝни ишла дан хѝарамссар тѝий. Му тѝайлассарив?

Тѝайлассар. Шариатрайн бувну арцул тѝахѝни-кѝичѝу, кьуса-гьиссилу, ягу цамур тахѝни ишла даву хѝарамссар. Арцул тѝахѝни ишла дан бучѝиссар цамур хѝалалсса тѝахѝни дакъахьурча.

Жаназалул чак цѝа инсаннал бан бучѝиссарив?

Жаназалул чак цѝа инсаннал барча, гьассар, амма чѝявуссаннал жамьатрай барча хьинссар. Жамьатрай булларча, шанма цѝа бувну бацѝаву суннатссар. Идавсил ﷺ увкуссар: «Ивкѝуманаха жаназалул чак шанма цѝа бувну барча, Аллагьнал ﷻ ганал бунагьру шюшинтѝиссар», - куну. Амма шанма цѝа бансса жамьат батѝиннин ялугьлай жаназѝа-чак махьун бутлан къааьркинссар.

Бучѝиссарив хьамитайпалун бакѝрай карщи дакъа чаклин биссун?

Бучѝиссар, чил арамтуран чѝалай бакьахьурча.

Бусурман акьасса инсаннал ка дугьарча чаклин иссаву зия шайссарив?

Адимиал адимиал ка дугьаврийну ягу хьамитайпалул хьамитайпалул ка дугьаврийну чаклин иссаву зия къашайссар.

Каний кьил духьурча, чаклин иссаву хѝисавссарив?

Хѝисавссар.

## ДУАЬ

ЧАКЛИВУ «АТТАХИЙЯТРАЛ» ХЬИРИВ ВА ДУАЬ ДУРККУНУ ХЬИНССАР

اللَّهُمَّ إِنِّي أَعُوذُ بِكَ مِنْ عَذَابِ الْقَبْرِ وَمِنْ عَذَابِ جَهَنَّمَ وَمِنْ فِتْنَةِ  
الْمَحْيَا وَالْمَمَاتِ وَمِنْ شَرِّ فِتْنَةِ الْمَسِيحِ الدَّجَالِ

Аллагьумма инни аоьзу бика мин аьзаби джагьаннама ва мин аьзабиль-къабри ва мин фитнатиль-махѝгья валь-маматѝи ва мин шарри фитнатиль-масихѝи-д-дажжал



Мяьна: Я Аллагь, на Вийну чѝа тѝий ура дуржагьрал цѝарая, гьаттавусса аьзаврая, оьрмулул ва бивкѝулул фитнардаѝа ва Дажжалул фитналия уручѝаву.

## Рузнама

Ноябрь

Кьини	Кѝюрххил чак	Баргь буккаву	Ахттайн чак	Ахттакьун чак	Маркѝачан чак	Хьатѝан чак
1	5:50	7:21	12:39	15:20	17:46	19:13
2	5:51	7:22	12:39	15:19	17:45	19:12
4	5:53	7:25	12:39	15:17	17:42	19:10
6	5:55	7:27	12:39	15:15	17:40	19:08
8	5:57	7:30	12:39	15:13	17:37	19:06
10	6:00	7:32	12:39	15:12	17:35	19:04
12	6:02	7:35	12:40	15:10	17:33	19:02
14	6:04	7:37	12:40	15:08	17:31	19:00
16	6:06	7:40	12:40	15:07	17:29	18:59
18	6:08	7:42	12:41	15:06	17:28	18:58
20	6:10	7:45	12:41	15:04	17:26	18:56
22	6:12	7:47	12:42	15:03	17:25	18:55
24	6:14	7:50	12:42	15:02	17:23	18:54
26	6:16	7:52	12:43	15:02	17:22	18:54
28	6:18	7:54	12:44	15:02	17:21	18:53
30	6:20	7:57	12:44	15:01	17:21	18:53